

# Kontuola

ANTZUOLA / Egubakoitza / 2002ko martxoaren 15a / 105. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com

## Arau subsidiario berriak onartu ditu udalbatzak

AINTZANE IRIZAR

Martxoko osoko bilkuran, arau subsidiarioen dokumentu berria onartu zuen udalbatzak. Diputazioak onartzea besterik ez da geratzen, behin betiko dokumentua esku artean izateko. Aldaketa garrantzitsuak aurrez ikusi dituzte arau subsidiario berrietan.

Dokumentu berriak herrian hainbat aldaketa garrantzitsu egiteko bide ematen du; hona hemen berrikuntza garrantzitsuenetako batzuk.

Uzarragarako zubian aurrez ikusi da horietako bat. Bidegurutze garrantzitsua bilakatuko da hori; oraingo zubia baino behe-raxeago, Bergara alderago, zubi berria egitea aurrez ikusi dute, horrela, Matz-Errekarako bide berria egiteko. Bestetik, Elayrako errepidea ere egingo dute, Uzarragarako zubian hasi eta Beheko Auzoaren ostetik igaroko dena. Horretarako, jakina, oraingo zubia ere berritu egin beharko litzateke, hau da, zubi zabalagoa egin beharko litzateke.

Arau subsidiarioek dakarkiguten beste berrikuntza nabar-



AINTZANE IRIZAR

Oraingo zubia berritu eta behe-raxeago beste bat egitea aurrez ikusi dute.

men bat: Elektrikako etxea deritzona kendu eta etxe berria egingo dute. Gainera, Elektrikako etxearen inguruan dagoen berdegunea zabalduko lukete, bide batez, Beheko Auzoa ere itxuraldatuz. Bestalde, Beheko Auzoa Etxezuri aldameneko zubi berri

horrekin lotuko litzateke, eta han dagoen zirkulazio arazoa arindu egingo luke.

Sagasti ingurua ere dezente aldatuko da arau berrien arabera. Seytra eta Balzers lantegiak kendu eta hainbat etxebizitza multzo egiteko asmoa dute.

## ERAKUSKETA

### Argizaiol erakusketa oraingo asteburuan

Felix Pinillosek egindako 50 bat argizaiol ikusteko aukera izango dugu bihar, zapatua, eta etzi, domeka, Olaran etxeko aretoan. 12:00etatik 14:00etara eta 19:00etatik 20:30era egongo da zabalik erakusketa.

Donostiako San Telmo museoan dauden argizaiolen kopiak izango dira Olarango 50 piezok.

Argizaiol bakoitza testu batek lagunduko du. Testu horretan, argizaiolaren gaineko deskribapena egingo zaio ikusleari. Argizaiolak Felix Pinillosek egindakoak diren arren, Luis Angel Agirrek egin ditu deskribapen horiek. 50 argizaiolak formaren, dekorazioaren eta bilakaeraren arabera daude sailkatuta.

## ERRETIRATUEN ELKARTEA

### Zapatuan egin zuten erretiratuek batzarra

Joan den zapatuan egin zuten Erretiratuen Elkarteak urteko batzarra. 65 bazkide elkartu ziren.

Aurreko ikasturtearen balorazio positiboa egin zuten orokorrean, eta datorren urtean egitarau berarekin jarraitzeko asmoa erakutsi zuten. Bergarako San Joxepe elkartearekin duten lankidetzarekin jarraitze-

ko asmoa ere agertu zuten, Kultur Hamabostaldiari dagokionez, batez ere.

Bestalde, 80 urtetik aurrerakoek kuotarik ez ordaintzearen inguruan ere aritu ziren batzarrean, baina ez zuten erabakirik hartu. Batzar berezia egingo dute laister, horren gainean behin betiko erabakia hartzeko.

## HERRITARREN HITZA / Alaitz Jauregi • Gizarte laguntzailea

### Gure hiria edo zikinkeria

Lehen hain modan egon zan esaldi hau aspaldixan ez dogu inguruan ikusi edo entzun, baina horrek ez dau nahi esaterik zihero ahaztia komeni danik. Hala eta guztiz be, nere ustetan behintzet, pixka bat alde batera laga dogula pentsatzen jat. Zergaittik esaten doten hau? Segiduan esplikauko dotsuet. Azkenaldi honetan jo jatzue begirada bat herriko errekiari? Egixa esan, urik ez dakitt dagon, baina errekiaria baino gehixago Amazonas emuten dau, bere abere eta guzti. Uste baino lehenago hipopotamuan neurriko arratoiak ezkutauko die-ta

bertan; zoologikua ipintzeko moduan gare herrixan. Aberien gainian berbetan garela aprobetxauaz, beste gauza bat: laister etxetik be ezingo gara irten, atia zabaldu orduko txakurren baten kaka pillia dogulako oinetako azpizan. Hau da jiria, hau! Nik uste dot igerilekuen proiektua alde batera laga eta txakurren komun publikuak egitten hasi beharko dirala. Igerilekuak? Gure



“Laister herri politt eta eder bat edukiko dogu”

intensiñua gimnasia egittia bada, ez daukagu igerileku biharrik, orain dala hilabete (gutxi gorabehera) merke asko patinatzeko aukeria eduki giñuan antzuolarrak kale guztian zihar zabaldu zan olixuari esker. Txuri-Urdin gratis eta herrittik irten be egitteke!

Onena goizetan izaten da, kalegarbitzailliak haizia botatzeko aparatua horrekin kaleko zikin danak atari

barrutara trasladatzen dittuanian.

Bueno, bale, dana txarra ezingo dot esan, ezta?

Udaletxian aldetik herrixa txukuntzeko ahalegiña nabarmena ez danik ezin esan: bai bertako langillien aldetik, kalien garbittasunagaittik, eta baita Sagasti eta Aiherra arteko kale berrixagaittik, eta egitten diharduen Kultur Etxe berrixagaittik be bai. Argi dagona da, laister, hemendik denboraldi batera Gugenheim-ekin berakin konparau be ezingo dan herri politt eta eder bat edukiko dogula antzuolarrak.

## LABUR

### Mongolia ikusgai eta hizpide eguazten iluntzean

Urteko batzar orokorra egingo du Arrola mendi elkarteak datorren eguaztenean, martxoaren 20an. 19:00etan izango da hori, Olaran etxeko aretoan, hain zuzen ere.

Batzar orokorra bukatu eta gero, 20:00ak aldera, Mongoliaren gaineko ikus-entzunezkoa eskainiko du Jose Ramon Agirre Marron-ek. Diapositiba emanaldia eta berbaldia egingo ditu Agirrek Olaran etxean bertan, *Mongoliako estepa eta arnasa* izenburupean.



## IRAKURLIARENTXOKUA

### ANTZUOLAKO BATASUNARI

2002ko martxoaren 8ko KONTUOLAn kaleratutako Antzuolako Batasunaren gutunari buruz hiru ohartxo baino ez:

1. Martxoaren leko KONTUOLAn iritzi artikulua idatzi zuena Joseba Lezeta da. El Diario Vasco Antzuolako berrie-mailea da, baina baita Kontxi Alberdi eta Juanito Lezetaren semea. Olamendiko Emili zenaren eta Juane zenaren biloba, Marina Peñak eta Bixente Alberdik hazitako mutiko potoloa, Justina, Bittori, Jose Mari eta beste zazpi anai-arrebaren iloba, Peña Ayastuyko kidea, txirrindulari karreretan antolatzaile ibiltzen den txorimaloa, AKEko eta Olaldeko bazkidea, Juanjo Polleroren aurrelari negargarria Herriko Pilota Txapelketan... Antzuolako Batasun Goizperko langileak, Elaykoak, Matz-Errekakoak, Camachonekoak, tabernariak eta hainbat ofiziota-koak daude. Lanetik kanpo euren bizimodua dute guztiek. Baina, itxura denez, nik neure lantokiko langilea baino zerbait gehiago naizela aldarrikatu behar dut. Aintzane Irizarrek niri eskatu zidan KONTUOLAn idazteko, ez DVko zuzendariari.

2. Ez dut uste Garzon eta Aznarren erantzuna eskatu nuenik.

3. "Antzuolako pintadak kentzearen kostuak gure jubilatuen soldatak murrizten dituela insinuatzen" nuela diozue. Nik zera idatzi nuen: "Eskerrak Euskal Herriko ekonomia indartsu dagoen. Noizbait lana gutxitu eta erakundeen diru bilketa jaitzen bada, errukinak gara. Batzuk pentsiorik gabe geratuko dira". Agian datu honekin poztuko zarete. Antzuolako pertsona bakarrak zoriondu nau artikulua gatik. Jubilatua da bera.

JOSEBA LEZETA

### ANTZUOLAKO BATASUNARI

Martxoan 8ko KONTUOLAn, Antzuolako Batasunaren izenian azaldutako kartai buruz, hauxe (eta espazio faltaz idazteik ez daukaten beste batzuk) adierazteko premiña sentidu dot.

Behin eta berriz irakurri ditud Joseba eta Antzuolako Batasunaren iritzi artikulua eta, egia esanda, Joseban artikuluan inon ez dot topau Antzuolako Batasunak leporatzen jatzuen iritzirik. Joseban artikuluan inon ez dot irakurri gaur egun euskal gaztedixian zati bat ordezkatzeko daben erakundia ilegalizatzea eta klandestinitatera bultzatzea berri aipagarriak ez dienik, ez eta herritar honek, Garzón eta Aznarren erantzuna desiratzeko bide errepresiboa aukeratzeko dabenik.

Nere ustez, KONTUOLAn Josebak argitaratu daben iritzi-artikuluan, aittatutako pintaden inguruan bere iritzia emun besteik ez dau egin. Eta hori herritar batek eitten dau, zein enpresantzako lan egitten daben kontutan eduki barik, edo gure astekariko atal honetan argitaratzen dien beste iritzi-artikulu guztitan iritzi emalliak lan egitten daben enpresaren pentsakera eta jarrerak diela ulertu bihar dou? Edo, gutako bakoitzak, lan egitten doun enpresaren ideia eta pentsakerekin beti bat egiten doula eta ados gaela interpretatu bihar dou?

Eta Antzuolako Batasunak Joseban iritzi-artikulutik arestixan aittatu dituden konklusioak etara badittu, nere ustez, edo ez dozue ulertu idatzia eta berriz, nik egin doten moduan, astiro astiro irakurtzia gomendatzen dotsuet edo benetan, ez dakit zein interesekin, baiña demagogia arrisku-tsua egin nahi izan dozue gai honekin.

Pintaden gaixai buruz, espero neban bai Antzuolako Batasunaren iritzi argi eta garbixa jasotzia, baiña behin ere ez neban pentsauko, zuen iritzia gizurrian eta demagogian oinarrituko ziñuenik. Benetan, oinguan, mailla bajua erakutsi doskuzue.

XABIER LEGORBURU

## KIROLA

### Olalde eta Idiak ez kadeteak finalerdietarako sailkatu dira Debarroko Pilota Txapelketan

Martitzenean, hilaren 12an, Antzuolan jokaturako partiduan erabakita geratu zen finalerdietarako sailkapena. 13-22 galdu arren, 12 tantorekin nahikoa zuten sailkatzeko. Astelehenean, hilaren 18an, 19:30ean, Antzuolan jokaturako dute finalerdietako lehen partidua, Elgoibarren aurka. Zapatuan, berriz, Udaberri Sariko eta Gipuzkoako Liga-ko partiduak jokaturako dira Antzuolan, 16:00etatik aurrera.

### Aritz Berraondok lehen aldiz jokaturako du eskuz banakako lehen mailako txapelketa

Lehen mailako eskuz banakako txapelketa nagusian parte hartuko duen lehen aldia izango du Aritzek. Esainen eta Ariznabarretaren arteko partiduan irabazlearen aurka jokatu beharko du Aritzek, martxoaren 24an. Eskuak ez ei ditu oso ondo, baina ilusioa eta gogoia ez zaizkiola falta adierazi digu.

## PARTIDUAK

### FUTBOLA

Martxoak 16  
11:00: Antzuola-Urnieta (Kadeteak)

## EMAITZAK

### FUTBOLA

Antzuola 3 Ikasberri 1 (2. erreg.)  
Aretxabaleta 1 Antzuola 1 (neskak)  
Antzuola 3 Intxurre 2 (Gazteak)  
Antzuola 5 Beraun 5 (Kadeteak)

### PILOTA

Udaberri Sarria  
Olalde-Illunpe (eskuz nag.) . . . . 22-16  
Olalde-Ikaskirola (eskuz kad.) . . 11-22  
Altzaterra II-Olalde (paletaz) . . . 35-19  
Gipuzkoako Liga  
Beharzana-Olalde (infantilak) . . 18-11

## BOTEPRONTOAN/ Arkaitz Zabalo · Arrola mendi elkarteko presidentea

# "Ibarreko mendi taldiekin batera lan egittia izango da aurtengo erronkia"

**E**guaztenian, urteko batzar orokorra egingo dau Arrolak. Bertan, batzarreko kide batzuk laga egingo dabe kargua, eta bost batzarkide berri sartuko die. Gu Arkaitz Zabalo Arrolako presidentearekin egon gara.

### Badago berritasunik batzarri begira?

Ez, gutxi gorabehera urteroko antzerako batzarra izango da. Bost kidek lagako dabe batzarra eta beste bost sartuko dira. Eta, betiko moduan, urtiaren baloraziñua egingo dogu. **Zuek dagoeneko egingo ziñuen baloraziñua, ezta?** Irteeren gaiñian egitten dogun baloraziñua nahiko positibua da; batez be, ikusitta inguruko herrixetan nahikua gaizki ibiltzen diela, Antzuolan jente dezentek parte hartzen dau antolatzen ditudugun irteeretan. Hamazazpi irteera egin ditudugu urtian, eta batez beste 26 lagunek hartu dabe parte.

### Zein asmo daukazue hurrengo urtiari begira?

Kezka nagusixa da eskalatzeko errokodromua jartzeko toki egokirik ez daukagula. Baiña, bueno, hementxe jarri biharko

dogu, Kalebarrenen daukagun lokalian. Gizarte etxeko lanek irauten daben bittarterako, lokal hori emon doskue, eta oin ezin izango gara hasi beste bat eskatzen.

Bestetik, inguruko herrixetako mendi taldiekin elkarlanian hasi gara irteera batzuk alkarrekin antolatzeko, eta hori izango dogu beste erronka bat

oraingo urterako. Gaiñerakuan, betiko irteerekin jarraitzeko asmua daukagu.

### Osasuntsu dago mendizale-taldea herrixan?

Antzuolan eta darian antzera egongo dala uste dot; jentia mendira juten da, baiña gehixenak euren kabuz juten die. Ez die egoten guk antolatutako irteeren zain. Hori bai, Pirineoetara eta urrutiti samarretarako irteerarako bai animatzen da jente gehixago gurekin etortzera.

### Umiekin esfortzu berezixa egitten dozue, ezta?

Bai. Egutegixa begiratu beste-rik ez dago. Irteeren erdixak inguru umiendako antolatzen ditudugu. Alde batetik, lehen esan doten moduan, nagusixak gehixago juten dielako euren kabuz. Beste alde batetik, eskoliakin harremana daukagu eta eskola-kirola bultzatzeko dauken programiaren barruan, gure irteeretan laguntzen doskuelako. Gaiñera, Arrolan hainbat guraso dare, eta eurak arduratzen die gaztetxuenendako irteerak antolatziaz. Umien irteerekin oso pozik gare; izan be, dezenteko arrakastia edukitzen dabe.





## MUJIKA HARATEGIA



**Berezitasunak:  
Etxean hazitako  
zekorrek eta oilaskoak**

Kalebarren, 1.  
ANTZUOLA  
Tf. 943 76 64 34



Bidea eginez

Tallera: Uzarraga bidea, 10. Antzuola. Tf. 943 78 71 78  
Erakusketa: Kalebarren, 1. Antzuola. Tf. 943 78 71-79, Tf. eta F. 943 76 64 73

- Gasa
- Berogailuak
- Haire egokitua
- Enpresen mantenimendua
- Lurrin instalazioak
- Bero-aurrezteak
- Bainugelak. Proiektuak momentuan DIBaren bidez
- Birgaitze-espeditentak bideratzen ditugu

## LEKY-BERRI MERENDEROA

Janariak  
eta  
edariak

Tf. 943 76 60 94  
ANTZUOLA